



Stručna služba općinskog vijeća i općinskog načelnika

Broj: 01/1-02-1650/17
Ilijaš, 20.07.2017. godine

PRIJEDLOG

Z A P I S N I K

sa 11. (jedanaeste) sjednice Općinskog vijeća Ilijaš, održane dana 20.07.2017. godine, sa početkom u 10:00h.

Jedanaestom sjednicom Općinskog vijeća Ilijaš predsjedavao je zamjenik predsjedavajućeg OV-a Ilijaš g-din Alen Hasković.

Prisutni vijećnici:

| RB. | IME I PREZIME |
|------------|------------------------------|
| | SDA |
| 1 | MAHIR DEVIĆ |
| 2 | - |
| 3 | MUAMER DERVIŠEVIĆ |
| 4 | ALMA OMEROVIĆ |
| 5 | MEHMED SINANOVIĆ |
| 6 | ADEM ALIĆ |
| 7 | SAUDIN DURMIĆ |
| 8 | ARMIN MATORUGA |
| 9 | SEMIR DEDIĆ |
| 10 | HALID DIZDAREVIĆ |
| 11 | RASIM ŠEHIĆ |
| 12 | MELISA MATORUGA |
| 13 | ALEN HASKOVIĆ |
| | SDP |
| 14 | ALAN ŠERAK |
| 15 | DAMIR FILIPOVIĆ |
| 16 | MIRSAD OSMANOVIĆ |
| | SBB-FAHRUDIN RADONČIĆ |
| 17 | AKIF BEŠLIJA |
| 18 | SEAD ŠEHIĆ |
| | BPS-SEFER HALILOVIĆ |
| 19 | MUHAMED HANDŽIĆ |
| 20 | ALMIR ŠPIODIĆ |
| | GS |
| 21 | EDHEM HASANOVIĆ |
| 22 | ASIM MUJIĆ |
| | SAMOSTALNI VIJEĆNIK |
| 23 | SEMIR DIZDAREVIĆ |
| | LDS |
| 24 | MEHO DŽINDO |
| | STRANKA ZA SREDNJE |
| 25 | - |

Odsutni vijećnici:

1. Anel Bumbulović i
2. Besim Gljiva

Prisutni gosti:

1. Aida Muratović – Radio Ilijaš
2. TV SA

Ostali prisutni:

1. Akif Fazlić – općinski načelnik
2. Sanja Zagorac-Jozić – pomoćnik načelnika
3. Sadeta Brkić – pomoćnik načelnika
4. Meliha Avdibegović – pomoćnik načelnika
5. Merima Osmanović – pomoćnik načelnika
6. Zdravko Barić – pomoćnik načelnika
7. Nijaz Spahić – pomoćnik načelnika
8. Aziz Fazlić – pomoćnik načelnika
9. Ilda Kahriman – sekretar OV-a Ilijaš
10. Sadik Alić- komunalni inspektor
11. Đenan Suša – IT administrator

ALEN HASKOVIĆ – zamjenik predsjedavajućeg OV-a

Otvorio je sjednicu i konstatovao da postoji kvorum za odlučivanje (prisutno 23 vijećnika).

Zatim je dao na razmatranje zapisnik sa 10. sjednice OV-a.

Primjedbi na zapisnik nije bilo, pa je Općinsko vijeće jednoglasno usvojilo zapisnik sa 10. sjednice OV-a Ilijaš.

Pročitao je predloženi dnevni red, a obzirom da nije bilo primjedbi Općinsko vijeće je jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 10. sjednice
3. Prijedlog Odluke o pogodnostima za investiranje na području općine Ilijaš u svrhu razvoja i poticaja industrijske proizvodnje za 2017. godinu
4. Prijedlog Odluke o davanju saglasnosti za realizaciju priključka na vodovodnu mrežu u naselju Donja Vratnica općina Visoko
5. Prijedlog odluka o:
 - a) usvajanju Regulacionog plana "Apartmansko naselje Sovrle 1"-Ilijaš
 - b) provođenju Regulacionog plana "Apartmansko naselje Sovrle 1"-Ilijaš
6. Nacrt Odluka o:
 - a) provođenju Regulacionog plana "Apartmansko naselje Sovrle"
 - b) usvajanju Regulacionog plana "Apartmansko naselje Sovrle"
7. Prijedlog Odluke o načinu i uslovima prodaje neizgrađenog gradskog građevinskog zemljišta - Alića Gaj.

AD-1
Vijećnička pitanja i inicijative

ALMIR ŠPIODIĆ – vijećnik BPS-Sefer Halilović
Pitanje:

1. S obzirom da su u toku radovi na izgradnji "BIZNIS FORUM CENTRA" u sklopu KSC-a, postavlja se pitanje dali će se vršiti rekonstrukcija prostora ispred KSC-a, odnosno pločnika koji je u lošem stanju i kao takav se ne uklapa u okruženje i ambijent koji ga okružuje.

ADEM ALIĆ – vijećnik SDA
Pitanje:

1. Zašto Direkcija za puteve KS nije realizovala Projekat "Horizontalne i vertikalne signalizacije" na području naše općine, odnosno na putu Ilijaš-Mrakovo-Salkanov Han-Popovići u dužini od 4,5 km na prostoru MZ Mrakovo, iako je obezbijeđen projekat već duži niz godina.

Obrazloženje: Više puta su vijećnici OV Ilijaš postavljali navedeno pitanje u ranijim sazivima evo i sada što se može vidjeti iz zapisnika OV Ilijaš. Nikada se ozbiljnije nije pristupalo navedenoj problematici iako je bilo potrebno, jer problem postoji i u drugim MZ Općine Ilijaš. Na navedenom putu su često saobraćajni udesi sa smrtnim ishodom i policijskim organima je prepreka jer ne mogu kvalitetno zadokumentovati predmet itd. Navedene informacije su provjerene i u sjedištu direkcije.

Zaključak: Da odmah Direkcija za puteve KS uzme u prioritet realizaciju navedenog projekta sa svim sadržajima koji su neophodni za ovu vrstu puta gdje se odvija javni saobraćaj i gdje je povećan broj m/v za 300%.

ALAN ŠERAK – vijećnik SDP-a

Prije svega želim da izrazim svoje negodovanje, obzirom da nisam u potpunosti dobio odgovore na pitanja koja sam postavio na prethodnoj sjednici OV-a, jer na prošloj nisam bio, jer bi i tada naravno reagovao. Dakle, tražio sam spisak imena koga smo to do sada zaposlili u Osnovnoj školi "Stari Ilijaš"? Pozivaju se tamo na zaštitu ličnih podataka, što po mom mišljenju apsolutno nema veze sa onim što sam ja pitao. Jasno je da nekom ne odgovara to pitanje, međutim svi oni koji su vukli određene poteze po tom pitanju imaju da odgovaraju za iste. Dakle, ja opet insistiram i obnavljam to pitanje i tražim da mi se dostavi spisak svih naknadno uposlenih u Osnovnu školu "Stari Ilijaš", isključujući one koji su prema preraspodjeli tada iz Osnovne škole "Hašim Spahić" bili primorani da pređu u novootvoreni obrazovni objekat, koji se zove Osnovna škola "Stari Ilijaš". Također, evo dva mjeseca su prošla, a i dalje nisam dobio odgovor na pitanje koje sam uputio resornom ministarstvu obrazovanja Kantona Sarajevo i zanima me da li je uvaženi ministar subjektivno tumačenjem Pravilnika o prijemu uposlenika u osnovne škole koje gravitiraju na području Kantona Sarajevo, svojim Odlukama favorizovao određene ljude u odnosu na druge i na taj način po meni prekršio niz nekih moralnih i zakonskih odredbi. Dakle, insistiram i dalje na ovom pitanju, isto obnavljam također, a isto tako tražim da mi se dostavi na neki način evo i garancija da je to pitanje uopće otišlo iz ove Općine prema nadležnom ministarstvu, jer moram biti realan i reći da sumnjam da je ovo pitanje završilo

kod uvaženog ministra. Ukoliko ministar odluči, naravno da i dalje ne odgovara na ovu vrstu pitanja, onda će isti biti pitan na sjednici Skupštine Kantona Sarajevo ispred Kluba poslanika SDP-a BiH, samo što ćemo onda malo drugačiju priču pričati, onda ćemo konkretno o imenima pričati. Nisam znao da smo izvršili primanje uposlenika u JU KSC i Radio Ilijaš i ovom prilikom ću čestitati vijećnici SDA-e. Dakle, čestitam na poslu, a ovim putem ću Vas zamoliti, odnosno od Vas zahtijevati da Vaš posao obnašate, prije svega profesionalno, da isto ne izvještavate samo sa skupova SDA-e. Dakle, stavite se u funkciju onoga za šta ste izabrani, odnosno imenovani, postavljeni i od Vas ubuduće očekujem kada budete objavljivali bilo koju vrstu članaka, kako na portalima tako i putem javnog emitera da to bude ono što se zove javno, jer to nije stranački medij da se razumijemo, to je medij koji pripada svim građanima općine Ilijaš.

AKIF BEŠLIJA – vijećnik SBB BiH Ilijaš

Shodno Inicijativi pokrenutoj na prošloj sjednici, a u vezi dionice puta od mosta i skretanja za Vratušu pa sve do Polomske ulice u Podlugovima, te odgovorom koji ste mi dostavili molim nadležnu općinsku službu da mi dostavi sljedeće:

1. Da li je nadležna općinska služba od novembra 2016. godine pa do juna 2017. godine izlazila na teren da utvrdi činjenično stanje na pomenutoj dionici?
2. Da se dostave svi Zaključci koji su dogovoreni na sastanku sa predstavnicima BH Telecoma.
3. Da li je urbanističko-građevinski inspektor, obzirom da je ova dionica puta u vrlo teškoj situaciji, bio na terenu u periodu od 29.06.2017. godine.

DAMIR FILIPOVIĆ – vijećnik SDP-a

Pitanje:

1. Tražim da mi se elektronskim putem (e-maila), dostave sva postavljena pitanja i inicijative, kao i odgovori na iste koje sam uputio na svim sjednicama u ovom mandatu.

Inicijativa:

1. Upućujem inicijativu da se od Spomen česme pa do Doca, prema Sovrlama izvrši rekonstrukcija puta.

AD-2

Izveštaj o realizaciji zaključaka sa 10. sjednice

Diskutanata po ovoj tački dneвно reda nije bilo, pa je OV-e jednoglasno usvojilo

Izveštaj o realizaciji zaključaka sa 10. sjednice

AD-3

Prijedlog Odluke o pogodnostima za investiranje na području općine Ilijaš u svrhu razvoja i poticaja industrijske proizvodnje za 2017. godinu

Općinski načelnik - AKIF FAZLIĆ

Kao što ste upoznati vlada Kantona Sarajevo u svom je budžetu za 2017. godinu i u svom programu rada za 2017. godinu, definirala jednu budžetsku liniju koja znači potporu razvoju industrijske proizvodnje u Kantonu Sarajevo i realizacija tog programa ide preko

općina, prije svega općina koje imaju industrijske zone, dakle općina Vogošća, općina Ilijaš, općina Hadžići i općina Trnovo. Realizacija te odluke budžetski je već praktički pripremljena, na određeni način implementirana kroz potpisivanje sporazuma sa općinama. Općina Ilijaš je prije nekih dvadesetak dana potpisala sporazum sa Ministarstvom privrede Kantona Sarajevo za realizaciju ovog projekta. Ovim projektom je obezbjeđeno 300.000 KM za poticaj industrijskoj proizvodnji i mi smo na bazi razgovora sa općinama koje implementiraju ovu vrstu projekta, otprilike se opredijelili da imamo jedan sličan pristup. Prije svega, to je pristup u smislu da kroz ovu Odluku, podstaknemo izgradnju proizvodnih pogona, u smislu refundiranja troškova rente i troškova uređenja. Dakle, ova sredstva bit će, upravo na taj način realizirana. Dakle, svim privrednim subjektima koji će ispunjavati ove kriterije, u odluci ste vidjeli koji su to kriteriji, koji su to uslovi, bit će refundirani troškovi rente i troškovi uređenja građevinskog zemljišta do 75% vrijednosti tih troškova. Ova Odluka je dakle, preduslov da donesemo pravilnik, da raspišemo javni poziv. Kao što ste vidjeli, ovaj javni poziv će imati dva svoja nivoa. Dakle, prvi eliminirajući gdje ćemo identificirati sve privredne subjekte koji ispunjavaju ove eliminatorne uslove u smislu da nemaju obaveza prema državi, u smislu poreza i doprinosa, da zapošljavaju određeni broj ljudi, da se bave proizvodnom djelatnošću, a u drugom nivou ovog javnog poziva će onda dokazivati da imaju urbanističku dozvolu, da imaju riješeno pitanje vlasništva na lokaciji na kojoj će se graditi, da će dati izjave vezane za broj zapošljavanja kroz ovaj projekat. I evo ono što je jako bitno, jeste da postignemo tu dinamiku kako bi do kraja godine povukli ovih 300.000 KM od Kantona Sarajevo i realizirali ovaj značajan projekat. Ovaj projekat nas uvodi u jedno stanje, kada ćemo njegovom implementacijom dati jedan značajan podsticaj, ali pošto se on uvodi ne bi ga trebali jednokratno uvesti. Ovo bi značilo da probamo i u narednim godinama u kontinuitetu obezbjeđivati ovakve uslove za izgradnju proizvodnih hala i to ćemo kroz dalje aktivnosti, kada je u pitanju i naš Budžet i budžet Kantona Sarajevo, pokušati definirati da ovo bude jedan kontinuirani program koji će zaista lišiti dalji razvoj naše privrede. Prije svega, ovdje se misli na industrijsku proizvodnju i naravno koliko god moguće izvozno orijentisano.

MUHAMED HANDŽIĆ – vijećnik BPS-a

Ovo je zaista jedan dobar projekat i nadam se da će ova Odluka izvršiti pripreme da se uradi jedan kvalitetan pravilnik o stimulanju ovih privrednika koji će ulagati, investitora koji će ulagati na našoj općini i nadam se da će u tom pravilniku biti sadržano ono sve što nedostaje našoj općini, a to je u najvećoj mjeri, zapošljavanje mladih ljudi, da će to biti jedan uslov. Dakle, investitor kojem se da ovakav podsticaj treba ga usloviti, uraditi uslove i standarde koje će on ispuniti da bi dali sva pripremna sredstva za otvaranje privrednih subjekata na našoj općini. Ovdje prije svega mislim na zapošljavanje Ilijašana, ja sam to nekoliko puta na sjednici potencirao, zaista imamo vrlo malo naših ljudi u ovim privrednim subjektima koji dolaze na našu općinu. Ja ću navesti samo primjer Standarda jedne godine primi sto radnika, sljedeće godine otpusti sto, te primi novih sto. Rotiraju se različiti ljudi, skidaju se sa biroa za jedno kratko vrijeme i to nam nimalo ne ide u prilog. Imamo također u industrijskoj zoni par privrednih subjekata koji zapošljavaju po nekoliko desetina radnika, ali radnici imaju takve uslove u tim firmama da ih zaista ne mogu podnijeti. Navodim primjer, daje platu 500 KM radniku, za koju on mora biti devet sati na traci non stop, gdje neće imati zamjene za obavljanje nekih vjerovatno fizioloških potreba i slično ili ako je u pitanju žena ili trudnica sigurno će dobiti sljedeće godine otkaz. Dakle, mi kao zakonodavna vlast na području gdje se otvaraju ti privredni subjekti moramo donijeti i neke uslove i standarde koje ćemo naložiti tim privrednicima kako bi se oni pridržavali istih.

MIRSAD OSMANOVIĆ – vijećnik SDP-a

Ne vidim ovdje mogućnost ulaganja ljudi koji tek kreću u biznis.

MUAMER DERVIŠEVIĆ – vijećnik SDA

Čestitam općini i zahvaljujem se Općini Ilijaš i Ministarstvu privrede Kantona Sarajevo na ovakvoj jednoj Odluci i ono što hoću da poručim općini, da mi ovakve jednostavne stvari trebamo malo više i medijski promovisati, da bi ovi koji se možda brinu više od nas u Općini Ilijaš, ako neće da čuju, vidjeli ovako barem putem medija o kakvim se odlukama radi. Drugo, što je zadatak nama svima na području općine Ilijaš da možda već razmišljamo o novim industrijskim zonama na području Općine Ilijaš, jer mi znamo da ovo što imamo kad je u pitanju industrijska zona Luka i PD Bosna, da su to već kapaciteti popunjeni i da mi u tom smjeru trebamo razmišljati, a kako ide intezitet dolaska investitora i ovakvih odluka, zaista vidimo da ćemo kada je Ilijaš u pitanju, ispuniti ono što smo rekli kada je u pitanju zapošljavanje mladih sa područja općine Ilijaš, te ono što smo rekli u programu rada načelnika i ovog Općinskog vijeća u ovom četverogodišnjem mandatu.

Općinski načelnik - AKIF FAZLIĆ

Dakle, ova Odluka ne podrazumijeva ove start up programe, za početnike ima vlada i te vrste programa je razvila, pošto se radi o vrlo ozbiljnim podsticajnim mjerama koje nose zaista i visoku cifru, mislim negdje milion maraka u Budžetu Kantona, da je za ovu budžetsku liniju obezbjeđeno. Dakle, ovdje se traže reference postojećih firmi, vidjeli ste u Odluci, dvije godine pozitivnog poslovanja, izmirenja svih obaveza, industrijska proizvodnja, naravno da se preferira i ako je izvoz, onda će on dati dodatne poene i neka pozicija koja podrazumijeva da su te firme u svom razvoju već ušle u jednu fazu koja znači izvođenje urbanističkih dozvola koje su riješile pitanje vlasništva na lokacijama, dakle firme koje su sada u ekspanziji. Zapravo kroz ovaj projekat želi se ubrzati ono što te firme pokreću, ubrzati izgradnja proizvodnih objekata kako bi što prije došli do onih pravih efekata, a to jest povećanje novostvorenih vrijednosti i zapošljavanja. Nove firme, zaista kroz niz novih programa koje postoje, ne samo kroz programe vlade Kantona Sarajevo, nego evo i službe zapošljavanja i SERDE i Federalnog Ministarstva za razvoj i obrt, imaju naravno u nekom manjem kapacitetu. Mi sada imamo projekat, oko stotinu zahtjeva ima za ove obrte. Ono što me raduje jeste da je u našoj službi za privredu podnešeno oko stotinu zahtjeva za ove male biznise. Kada je u pitanju ovo što je govorio Muamer Dervišević, mi ćemo zaista doći, već smo zapravo došli u fazu, kada pitanje novih lokaliteta za industrijske zone moramo osmišljavati. Znamo da je ovo područje Ilijaša već urbanizirano, gusto naseljeno i infrastrukturno, toliko opterećeno da pitanje novih većih zona će biti teško riješiti, ali to ne znači da nećemo tražiti odgovore na ta pitanja i možda definisati lokalitete izvan ovog centralnog područja. Ono što raduje, jeste da svi ti zaista ekonomski pokazatelji kada je u pitanju općina Ilijaš, imaju uzlazne trendove i mi se trebamo kroz svoje djelovanje truditi da ih zadržimo i ako je moguće naravno ispunimo.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Prijedlog Odluke o pogodnostima za investiranje na području općine Ilijaš u svrhu razvoja i poticaja industrijske proizvodnje za 2017. godinu

Prijedlog Odluke o davanju saglasnosti za realizaciju priključka na vodovodnu mrežu u naselju Donja Vratnica, općina Visoko

Općinski načelnik – AKIF FAZLIĆ

Mi svi znamo da naš gradski vodovodni sistem ima ovu jednu situaciju koja je nastala još prije 1992. godine, kada je rađena gradska vodovodna mreža u mjesnoj zajednici Ljubinići, mjesnoj zajednici Lješevo i kada je kroz projekat proširenja te gradske vodovodne mreže obuhvaćeno i naselje Donja Vratnica. Tada su te dvije mjesne zajednice i dio mjesne zajednice Vratnica, odnosno podružnica Donja Vratnica zajednički realizirali projekat gradske vodovodne mreže koji je podrazumijevao vodosnabdijevanje stanovništva kroz naš gradski vodovod, odnosno sa vodozahvata Misoča. To naslijeđeno stanje je proizvelo da trenutno na području podružnice Donja Vratnica u situacijama kada dolazi do širenja domaćinstava, do izgradnje novih objekata ima se problem regularnog priključka na postojeću vodovodnu mrežu i ono što mi želimo ovom odlukom, da stavimo taj prostor u jedan regularni okvir, da stavimo prava na vodu tih građana u jednaka prava na vodu svih građana kako to i jeste zakonom o vodama definisano bez obzira na administrativne granice. Dakle, da budemo potpuno jasni i korektni, to područje zbog administrativnih granica koje vjerovatno nisu uopšte praktične, administrativna granica sa općinom Visoko trebala je vjerovatno ići nekom drugom linijom i zadržati upravo prirodnim putem i ova područja, određeni broj ljudi doveden je u poziciju da ne mogu imati svoj neki razvoj i zbog toga je predložena ovakva Odluka. Nismo željeli da idemo na pojedinačne zahtjeve i da kroz davanja nekih saglasnosti nekom pojedincu ili ne davanja nekom drugom pojedincu, želimo zapravo da njih sve stavimo u isti tretman. Obzirom da uvijek kod nas ima te primjese, šta to znači za širenje broja potrošača na našoj vodovodnoj mreži, ovdje mi kao predlagači u prvom pasusu, gdje se kaže, daje saglasnost Javnom komunalnom preduzeću Vodostan Ilijaš na realizaciju priključaka na vodovodnu mrežu za domaćinstva. Dakle, da bi se izbjegla neka opasnost, mada dole nema prostora, svi mi znamo odlično da je to područje urbanizirano, izgrađeno, ali ovdje bi dodali, za domaćinstvo u naselju Donja Vratnica, pa onda kako slijedi u ovom opisu. Time bi i doveli naše Javno komunalno preduzeće da ima jedan regulatorni okvir, a dalja premišljanja mogu ići, da vidimo zajedno sa općinom Visoko i njihovim Javnim komunalnim preduzećem, da možda na neki drugi način, da li direktno sa njima, naš Vodostan sklapa ugovor. Ali, obzirom da je već godinama taj sistem uspostavljen, mislim da nema problema, da on nastavi da funkcioniše kako i funkcioniše i da ovom Odlukom se zapravo ne ugrožava ništa, što možda mislimo da će se ugroziti.

DAMIR FILIPOVIĆ – vijećnik SDP-a

Ono što je bojaznost ove Odluke, po mom mišljenju, je to da ćemo dati mogućnost manipulacije priključka u ovakvom periodu, kada je nestašica vode i resursa kojim se konkretno bavi Općinsko vijeće i raspolaže Općinsko vijeće. Mi trebamo donositi odluke po svakoj pojedinačno, s obzirom da smo imali i prošle godine vezano za privredni subjekat, ovdje se radi o domaćinstvima, ali postoji bojaznost da bi to moglo otići u neku širu mrežu. Visoko inače ima problem sa vodom, nije to samo Vratnica, ako mi imamo toliko viška vode, mogli bi da uzmemo od načelnice milion kredita što je digla pa da joj pružimo vodu i do Gračanice.

Slušajući načelnika Akifa Fazlića i njegovo obrazlaganje, da budemo jasni, načelnik je očito odlučio da promijeni kurs kada je u pitanju vodosnabdijevanje općine Ilijaš. I ovo nije onaj Akif Fazlić koji je na prošlim savezima Općinskog vijeća predlagao zaključke po pitanju iste te Donje Vratnice, da bi mi trebali ustanoviti dokle je ta voda zapravo i došla, jer smo se bojali da ćemo ostati bez vode kao što jesmo, na snazi je redukcija u vodosnabdijevanju na području Općine Ilijaš i mi to svi vrlo dobro znamo. Cijelo vrijeme SDP ukazuje na to da ćemo imati ozbiljnih problema kada je vodosnabdijevanje u pitanju, jer se to manifestuje iz godine u godinu. Imamo druge obaveze, po pitanju drugih naselja koje ćemo i danas usvajati regulacione planove. Dva takva tipa naselja, treba to sve opskrbiti vodom u takvim količinama kojim bi trebalo da opskrbimo, a znamo da općina Ilijaš ima ozbiljnih problema kada je vodosnabdijevanje u pitanju. Dakle, znam lično, da je načelnik kada nije bio načelnik, predlagao zaključke tadašnjem vijeću i imao određeni stav, da se voda ne treba davati u Donju Vratnicu, čak šta više, da trebamo ustanoviti da li je onaj broj domaćinstava kada se ugradio taj sistem dole i dalje u istom obimu ili se to razgranalo na neke druge stvari. Ja se bojim da ovakvom Odlukom narušavamo i onako krhak sistem vodosnabdijevanja Općine Ilijaš, do toga će neminovno doći. Ne znam šta se iza ovoga krije uistinu. Ima dole jakih privrednika, koji su vama bliski, možda se o tome radi, ima i toga jasno. Ali isto tako, sad se postavlja pitanje zašto mi ove godine, tragamo za alternativnim izvorima pitke vode i ulažemo stotine hiljada maraka da nađemo vodu, to očito radimo za potrebe građana susjedne općine, općine Visoko. Taj problem je prevashodno problem vaše kolegice, koja se zove Amra Babić i ona je izabrana od strane tih građana da rješava njihove probleme, to nije problem Ilijaša. Da ste vi došli sada sa prijedlogom, da mi riješimo problem vodosnabdijevanja Nišićke visoravni, Gajevima konkretno koji imaju sad probleme i nemaju vode, naravno da bi za to trebalo glasati, jer mi rješavamo probleme građana općine Ilijaš. Bojim se da smo malo polupali lončiće, ne znam kako da to nazovem. I ja imam stambeni objekat na području općine Visoko, nisam dolazio vama načelniče da mi vi rješavate taj problem, išao sam direktno kod načelnice općine Visoko koja mi je obećala da će to riješiti, digla je kredit za te stvari i neka rješava. Mi imamo drugih problema ove vrste, mi trebamo da se bavimo prevashodno tim problemom, a ne da bacamo pare za novom vodom, kao što to sada radimo, da bi mogli nekoga u Donjoj Vratnici snabdijevati vodom. Po meni to treba da ostane u ovom obimu u kojem jeste, čak šta više, da bude onaj zaključak kojeg ste vi predlagali da ga danas usvojimo. Dajte da vidimo je li postojeći broj domaćinstava prvobitni sada priključen na gradski vodovod u Ilijašu ili se to razgranalo na više stvari. Ako se to bude dalje širilo, onda će neko imati problema u zakonskom smislu, ili će SDP to pokrenuti.

MAHIR DEVIĆ – predsjedavajući OV-a

Što se SDA tiče, mi smo spremni da prodiskutujemo ovu vrstu Odluke, vrlo odgovorno i da zauzmemo zajedničke stavove kao organ, da se ne bavimo nikakvom vrstom nečega od čega nećemo imati koristi. Ovdje je činjenica slijedeće stvari, mi ovdje imamo taj vodovodni sistem kojeg su gradili građani, stanovnici mjesnih zajednica Lješevo i Donja Vratnica, ljude defakto na terenu koji koriste tu vodu, koriste tu mrežu, gradili su je, oni administrativno pripadaju drugoj općini taman da je po meni granica RS dole, ja ne bi imao nikakav problem lično, sa aspektom vode. Ova bojazan članova Općinskog vijeća u smislu da će ovakva vrsta odluke ugroziti sistem vodosnabdijevanja, kojeg nazivamo krhkim, prije svega, ja mislim da mi nemamo krhak sistem, mi imamo u ovim danima problem sa potrošnjom vode i sa tehničkom obradom vode, imamo problem što naši ljudi proliju bazen

vode za 2 sata, a treba 24 sata da prođe od hlorisanja vode da bi ta voda bila puštena u sistem iz bazena. Mi kao Vijeće bi se u nekom periodu trebali pozabaviti izmjenom odluke tarifne politike u smislu da kažemo u julu i augustu mjesecu kada dođe vrijeme za to po porodici je dozvoljeno da se potroši toliko kubika koliko je potrebno za korištenje. Mi sada imamo sljedeću stvar da naši ljudi zalijevaju travnjake, pašnjake, pune bazene i to je istina. Nije da nema vode, tehnička obrada vode podrazumijeva određenu proceduru koja podrazumijeva da hlor odstoji određeni broj sati i imamo problem sa naglim istakanjem sistema upravo zbog ovoga. Zašto? Zato što ljudima dođe jeftinija varijanta da zalijevaju bašte iz našeg vodovoda s obzirom na tu cijenu. Tako da, po meni, je više mjera predostrožnosti, ova dva mjeseca koja su opasna, juli i august da se mi u tom smislu kao Općinsko vijeće pozabavimo, napravimo tu neku tarifnu politiku u kojoj ćemo reći da četveročlana porodica, hipotetički kazano, potroši deset kubika u julu, a ako se potroši više od toga svaki naredni kubik je pet maraka, a ne devedeset feninga i mi nećemo imati problem u tom smislu sa vodom. Sada, kada je u pitanju ova Odluka, treba da je diskutujemo, da vidimo šta je ispravno, trebamo vidjeti šta je ljudski. Mi sada imamo situaciju urbano definisanog prostora do tog mosta, svi vi to vrlo dobro znate, urbanizacija tog prostora je skoro pa završena, nema se šta specijalno dodati, može se dodati pet ili deset kuća u narednih sedam ili osam godina, ljudi već koriste tu vodu. Hoćemo li mi sada sebe, kao Općinsko vijeće, dovesti u situaciju da kažemo da Meho koji je već priključen može imati vodu, a Hamo koji je napravio kuću dvadeset metara od njega ne može i da traži posebnu pojedinačnu saglasnost od ovog Općinskog vijeća i da "ganja" trinaest ruku hoćemo li mi to njemu dati ovdje ili nećemo.

Ja mislim da to nije principijelno, ono što jeste na neki način, zaštita nas od eventualne zloupotrebe, mada i to po meni nije, jeste da ovo što je načelnik predložio da kažem da to isključivo ide za domaćinstva i ako ste svjedoci da tom potezu, do mosta, nikakvih ozbiljnih ni specijalno privrednih subjekata ne može nastati jer je taj prostor urbaniziran. Postavlja se pitanje, da li će takva vrsta stvari ugroziti naš sistem? Ono ga ne ugrožava. Mi devet do deset mjeseci imamo viška vode koji možemo da prodamo, ne Vratnici nego Visokom. Ova dva mjeseca, mi imamo problem ogromne potrošnje vode. Dođe nam masa ljudi iz dijaspor, koji preko zime nisu tu, imamo puno poljoprivrednih gazdinstava i mi im bukvalno prospemo vodu. Po meni je ključ u setu svih onih mjera, pored istraživanja vode dodatnih količina, rekonstrukcije vodovoda, nalaženje ovih nelegalnih priključaka i to da mi kao Vijeće razmislimo o toj nekoj vrsti tarifne politike, da vidimo kako da to uradimo.

Po meni, mislim da od strane ovog organa ne bi bilo moralno da jedna kuća danas ima vodu, a ona koja će se sutra napraviti do nje nema. To je po meni više diskriminacija nego zaštita sistema, pogotovo što je to izuzetno mali broj objekata, mi smo za mandate Vijeća tri, pet godina, imali jedan, dva, pet zahtjeva i to su uvijek naravno bila domaćinstva.

Ljudi naprave kuću i traže sada vodu, bez obzira što to administrativno pripada općini Visoko. Ja mislim da mi u tom segmentu ne trebamo braniti naše lokalne interese, mi se trebamo otvarati prema svima. Bili smo mi ne tako davno u Visokom, jako dugo, četiri, pet godina u jednoj daleko goroj situaciji pa su nas ljudi primili i u Brezi i u Varešu. Tako da, ako zaista ima bojaza da će to na neki način ugroziti sistem, nismo ni mi iz SDA za to, ali ako nam struka kaže, da tih, tri ili pet kuća nisu problem, nećemo mi ovom Odlukom ništa ni ugroziti ništa doprinijeti u smislu očuvanja ovog sistema. Možda nije momenat odluke dobar. Konkretno, sada se radi o neka dva ili tri zahtjeva, ali ti ljudi defakto sada koriste tu vodu. Ne donosimo mi odluku da prikačimo novih dvjesto, jer oni to već troše, plaćaju. Ovdje je samo u pitanju da se taj prostor definiše i da se stavi u određene okvire.

ALAN ŠERAK – vijećnik SDP-a (replika)

Drago mi je što je i Mahir Dević počeo građanski razmišljati više nego stranački i to me uistinu raduje. Sjetit ćemo se kada smo uveli ne popularnu mjeru mjernog mjesta od dvije marke, da je tada SDP predlagao da se tarifna politika po pitanju Javnog komunalnog preduzeća treba mijenjati i upravo da se to tako uradi kao što je uradio Kanton Sarajevo po pitanju VIK-a. Do pet kubika išla je jedna cijena, ovi što malo više troše, malo će više i platiti i to treba uvesti. Ne samo za ova dva mjeseca nego inače da postoji ova odluka. Ako ćemo o stvarima koje se tiču onog mjernog mjesta, vidjet ćete da te neke stvari i nisu u skladu sa zakonom, nisu nejasne možemo reći. Jesmo donijeli tu vrstu odluke, međutim ista odluka koja se tako primjenjuje tako i zloupotrebljava. Što se tiče Donje Vratnice, kolega Deviću, vi ne možete uticati na stambenu politiku općine Visoko. Niti vi znate kakvo će naselje biti u Donjoj Vratnici, pod broj jedan, broj dva, da se tu radi o pojedinačnim domaćinstvima, ja iskreno sumnjam, jer ja znam da u toj Donjoj Vratnici imamo niz poslovnih objekata i subjekata i pitanje je da li su oni sada priključeni na postojeći vodovod? Sa druge strane, niko vam neće garantovati kada vi date ovu vrstu nadležnosti komunalnom preduzeću da će se oni toga uistinu pridržavati. Imamo tih velikih primjera u ranijem periodu, znate i sami da smo dobijali pozitivna mišljenja po pitanju vodosnabdijevanja piličare u Čekrčićima, pa je čak i načelnik Akif Fazlić predlagao da se to usvoji iako sumjam da je to njegov stav, jer ga poznajem od ranije i znam kakav je po pitanju vodosnabdijevanja. Dakle, ja mislim da ovdje prije svega, ne treba da bude klub, ovaj ili onaj za ili protiv, ovdje treba da bude odgovorna politika naspram građana općine Ilijaš, koji su nas ovdje birali i koje mi predstavljamo. Hajde da ovu Odluku povučemo sa dnevnog reda, hajde da u Lješevu organizujemo zbor građana, da vidimo šta oni misle za ovo, kao što smo radili za Ljubiniće, kada su bili u pitanju Čekrčići, dajte da čujemo stav građana općine Lješevu, ako je većina za to i ja ću je podržati, ali mislim da niko u ovom momentu nije spreman da da saglasnost za jednu ovakvu vrstu Odluke. Što se tiče tarifne politike, SDP je svakako spreman da radi sve ono što će poboljšati stanje kada je u pitanju vodosnabdijevanje ovdje, tako jeste i tako treba. Oni koji troše od 20 do 30 kubika vode mjesečno, treba da plaćaju više, u odnosu na one koji su koliko toliko racionalni kada je u pitanju potrošnja vode.

MAHIR DEVIĆ – predsjedavajući (replika)

Ne želeći da prelazim u bila kakvu repliku koja bi imala bilo kakve veze na ličnoj osnovi, ja ovdje pokušavam da skrenem pažnju Općinskom vijeću, da se mi trebamo baviti sistemskim mjerama, ja sam njih predlagao ovdje i prošle godine ako se sjećate, zaključkom Općinskog vijeća da se donese čitava strategija šta to mi trebamo uraditi iz oblasti vodosnabdijevanja na području Općine Ilijaš, lično kao predsjednik Općinskog odbora i potpredsjednik Kantonalog odbora radim na tome. Konačno mi smo i u programu rada Općinskog odbora vodu stavili u prioritet u narednom periodu. Samo, ja govorim sljedeću stvar ne mislim da da ćemo mi tim nekim pojedinačnim zabranama, zabraniti ćemo nekom apartmanskim naselju da ono ima ili nema vodu, ja sam to već govorio, diskutovao o tome, niti da ćemo na ovaj način nešto učiniti, ja sam za sistemske mjere. Mi ove godine ulažemo u sistem vodosnabdijevanja općine Ilijaš skoro dva miliona KM i borimo se za to i trebamo uložiti još četiri, osam, da imamo vode i da je prodamo do Kaknja, po meni tako se trebamo ponašati. Nije da mi nemamo vode, imamo vode, ja sam maloprije rekao šta je problem. Ja sam prekjucher sa direktoricom razgovarao na tu temu, problem je tehnička obrada te vode, jer iscuri, ljudi je za dva sata potroše i o tome se radi. Stvar je u tome što je ta voda u ovom momentu prejeftina, stvar je što tu vrstu priče nismo

ograničili da je ljudi ne prolijevaju, o tome se radi, pogledajte bazene okolo, to je problem. Nije problem voda za piće, higijenu itd. Ja samo smatram da mi ne trebamo gledati neki trn u oku, već gledati cijelu širu priču koja će nas voditi ka određenim poboljšanjima itd. Možda je momenat sada takav kakav jeste, toplo, ali ne vidim šta je problem zaista sa ovom vrstom Odluke. Znamo mi svi da je urbanizacija tog prostora završena, pa nema nikakvih dodatnih industrijskih zona na području Vratnice. Svi vi vidite da tu može stati još pet, sedam ili devet kuća. Sada da mi onako grubo, kao jedan ozbiljan organ kažemo, vi nećete dobiti vodu, vas tri zato što imate ličnu kartu u Visokom, a što je još gora stvar ova tri imate vodu, to nije po meni model kojim se trebamo voditi. Kada je u pitanju ova, što je kolega rekao, vezano za ovu Odluku Kantonalne vlade za tarifnu politiku, svi se slažu da ona ne valja nakon ove primjene i da je ona dovela vodovod u ozbiljan problem i u gubitak. Ova tarifna politika, koja je usvojena prije godinu, dvije, nije dala nikakav pozitivan rezultat i da je bila pogubna, prema tome ja sam za to, da se pozabavimo time, da do naredne sjednice probamo nekakav kvalitetan model prepisat, da se zaštitimo u ova dva mjeseca samo od prekomjerne na dnevnoj bazi potrošnje, a da nastavimo naravno kao Vijeće, glasali smo za taj budžet svi, u tom budžetu su bili, milion za rekonstrukciju filter stanice za ispitivanje, dodatna traženja vode, naravno to sve trebamo raditi. Ali ove neke stvari koje po meni, ne rješavaju problem, mislim da mi kao Vijeće to zaista ne trebamo raditi.

Ako treba pauza, pa ćemo diskutovati, načelnik je tu, sve su stranke tu, ako nismo za to, pa ni SDA nije za to, nemojte da bude da ovo nešto SDA gura. Ovdje je stvar jednog općeg odnosa ispram privrednih subjekata i prema svakom čovjeku koji ima pravo na vodu, mi smo govorili isto i za piličaru, mi imamo konzistentne stavove po tom pitanju. Ja bih lično i Općinski odbor SDA volio da imamo viška vode cijelu godinu koju trebamo prodavati, kao što je to uradio Vareš, krenuli smo u tom pravcu, jako smo se urbanizirali. Vidite šta je Ilijaš postao u zadnjih pet ili šest godina, koji broj objekata je dobio, a imao je staru infrastrukturu i stižemo sve te stvari i to po meni treba da bude, ne opredjeljenje jedne političke opcije, već treba da bude opredjeljenje ozbiljne politike. Vijeće treba da se bavi ozbiljnom politikom, a ne potezima kojima nećemo dobiti mjere, da ćemo mi sada dobiti neki efekat što ćemo zabraniti pet ili šest kuća, mislim da nećemo.

ALAN ŠERAK – Vijećnik SDP-a (replika)

SDP-u uistinu ne trebaju nikakve vrste pauza i nekakvih dogovora, mi imamo jedinstven stav po ovom pitanju. Dakle, postojeći broj domaćinstava koji je prilikom izgradnje te vodovodne mreže, prije rata bio na mreži treba da ostane u tom obimu, a ostalo bojim se da neće biti dobro i mi ovo svakako nećemo podržati, s tim da imam i prijedlog zaključaka onoga što je naš načelnik Akif Fazlić nekada predlagao, da se uistinu oformi neko radno tijelo koje će običi navedeno naselje i vidjeti da li je postojeći broj objekata i dalje na tom sistemu ili smo to mi malo proširili dokle je sve ta voda došla. Što se SDP-a tiče toliko.

AKIF BEŠLIJA - vijećnik SBB

Ono što je meni, bilo je i što je gospodin Šerak malo uzeo diskusije, jeste bilo bi mnogo lakše da sam ja u obrazloženju, da li od predsjedavajućeg Općinskog vijeća, onog ko je podnio ovu Odluku ili možda od Vodostana dobio informaciju u tom momentu, koliko je bilo tih potrošača prije kada su bili učesnici koji su finansirali, a koliko je tih sad potrošača koji koriste tu vodu. Naravno, ovo što gospodin Mahir kaže ja sada ne želim da vjerujem ili ne vjerujem, ali mi ne možemo ni obavezat se ničim da to u narednom periodu neće biti povećanja broja stambenih objekata koji će vršiti usluge vodosnabdijevanja, a naravno da ne pričamo možda o nekim apartmanskim naseljima jer mi ne znamo o njihovom

regulacionom planu, nemam na papiru niti sam glasao, neću da vjerujem ni priči bilo koga u tom smislu sve što nije napisano, iz tog dijela mislim da bi trebamo možda odgoditi ovu tačku i vidjeti koliko u datom momentu, kada je bilo sufinansiranje na ovom vodosnabdijevanju, bilo objekata kojima je dozvoljeno korištenje, koji možda i trebaju da koriste vodu, a koliko je tih sada korisnika, u ovom momentu koliko ih koristi to vodosnabdijevanje i onda da možda pričamo o tome. Meni i KV SBB-a je mnogo olakšao i zaključak Komisije za statut i propise kojim nisu dali pozitivno mišljenje. Naravno da se slažem da uvijek treba pričati i razgovarati i naći najbolje rješenje. Ovo što Alan kaže da treba vidjeti sa predstavnicima Mjesne zajednice Lješevo, ja se dijelom slažem, ali i ne slažem, jer i ja ću ispaštati, ne samo Lješevo, ja već ispaštam te redukcije u Mrakovu, ali evo gledam kao građanin i kao vijećnik ove općine Ilijaš da niko ne bude oštećen po ovom pitanju, tako da možda je najbolje rješenje da, dok se ne utvrdi činjenično stanje na terenu, povučemo ovu Odluku.

MAHIR DEVIĆ – predsjedavajući (replika)

Kada sam maloprije rekao da je to urbanistički zaokružen prostor, ne znam koji dio rečenice tu nije jasan dragi Akife, kakva apartmanska naselja, ideš ti putem od škole u Lješevu do Vratnice do mosta, koje apartmansko naselje ondje može stati, to je prostor koji je bukvalno 98 % zaokružen i ono što koristi vodu koristi, najveći dio njih koristi. Sada, hoće li niknuti kuća pored da brat ima, a drugi nema to je sad druga vrsta pitanja. Mi možemo izdiskutovati, napraviti pauzu pa ćemo vidjeti ko je za, a ko nije, ako nismo u konsenzusu da ovo podržimo možemo i odgoditi, to je najmanji problem, nego ja govorim ljudski i ja ne vidim da ćemo mi sistem spasiti zbog dvije tri ili pet kuća. Preozbiljan je sistem vodosnabdijevanja na području cijele općine da bi se on svodio na dvije ili tri kuće.

SAUDIN DURMIĆ – vijećnik SDA

KV SDA je razmatrao prijedlog Odluke o davanju saglasnosti za priključak naselja Vratnica na vodovodnu mrežu. Obzirom da je ovaj problem tretiran nekih 90-tih godina, da su to ljudi sami izgradili, ja kao čovjek, građanin, ne bih imao snage da dignem ruku i nekome zabranim tu vodu, a isto tako smo i u razgovorima sa načelnikom prije same sjednice, tragali za rješenjem i došli smo do jednog kompromisnog rješenja, obzirom da su pomenute granice, da se striktno naše Javno komunalno preduzeće pridržava obuhvata ovog područja, kao i da za privredna lica, privredne subjekte, ukoliko bi sutra došao neki privredni subjekat da ugrozi vodosnabdijevanje, da se traži naknadna saglasnost za privredne subjekte, da se ova voda tretira samo za potrošnju vode u domaćinstvima. Isto tako, da naše Javno komunalno preduzeće Vodostan povede računa, s obzirom da su instalirali na granici općine Ilijaš vodomjer, da nas povremeno informišu kolike su to potrebe građana i ukoliko dođe do enormnog povećanja potrošnje vode koja će biti evidentirana da nas blagovremeno informiše. U tom smislu Klub SDA će podržati ovakvu Odluku i evo u ime Kluba i ako treba da se napravi i pauza na sjednici pet minuta zbog dodatnih konsultacija.

AKIF FAZLIĆ – općinski načelnik

Ja vas sve želim još jednom podsjetiti da se radi o integralnom sistemu gradskog vodovoda. Nemojmo unositi priče za zahtjev piličare, zahtjev onog, zahtjev ovog, koji su izvan integralnog sistema gradskog vodovoda. Taj integralni sistem gradskog vodovoda uspostavljen je prije 90-te godine i obuhvatio je područja koja je obuhvatio pa prema tome

i područje Donje Vratnice, i sva Donja Vratnica, stanovnici te godine, svi koji su imali objekte tada su ušli u taj sistem, i ta potrošnja i proširenje tog sistema se dešavao nekim prirodnim razvojem, je li nastala još jedna kuća, je li nastalo još par kuća. Dakle, hoćemo li mi da taj integralni sistem da kažemo sada ovaj dio ćemo odsjeći, on je izvan administrativnih granica općine Ilijaš. Zna li koji pozivni broj fiksne telefonije imaju naše Gajine 032 dakle telefon je došao iz Olova u Gajine, struja je došla iz Istočnog Starog Grada Sarajeva u Vukniče i mnogo tih infrastrukturnih usluga koje jesu vezane za sisteme. Vi se dobro sjećate onih naših 25 dana bez struje, kada Elektrodistribucija nije htjela da prihvati međukantonalnu razmjenu struje, a mogli su odmah prihvatiti i napojiti nas iz Breze. Dakle, pričamo o sistemima koji ne smiju imati tu barijeru koja se zove administrativna granica. Dakle, ja sada nemam, od prije 90- tih godina, koje su sve tada odluke potpisane i imaju li one danas, ali tim odlukama je uspostavljen sistem. Ja vas zaista molim da prije svega to poštujemo, a i molim vas da zaista štitimo dignitet ove općine, njen ugled i njen autoritet kada su u pitanju ove vrste naših odluka. Zagovornik sam donošenja ovakve Odluke, a lahko je dokazati da njena primjena zaista neće ni za bogdu ugroziti naš sistem vodosnabdijevanja.

ALAN ŠERAK – vijećnik SDP-a (replika)

Zabrinjava me da vi ne znate, koji je obim sada u Donjoj Vratnici, ipak ste vi bili tamo izvršni direktor Vodostana, jedan kraći period. Dakle, suština jeste, načelnice dragi, da mi ako usvojimo ovu Odluku, ovo se Vijeće neće više pitati nizašta kada je u pitanju vodosnabdijevanje u Donjoj Vratnici. Da smo mi tada usvojili ovu Odluku, vi nas ne bi ni pitali, nego bi samoinicijativno vodu dali u Čekrčiče. Vi kao predlagač općine, predlagali nama i ubjeđivali nas da mi glasamo za tu vrstu odluke jer se tada Vijeće pitalo i ako damo danas saglasnost za ovu Odluku, Vijeće se više neće pitati. Gospodo draga, Vodostan će to raditi u saradnji sa općinskim načelnikom i davat će vodu kojem ono želi da da, to je suština. Hvala Bogu, imali smo prilike da vidimo vaše razmišljanje po tom pitanju u prošlom savezu Općinskog vijeća, kada se to upravo tretiralo zbog one piličare koja se nalazi u Čekrčičima. Vijeće ima i dalje da se pita, vijeće ima u svom resursu i dalje da se pita, mi smo osnivač toga i to je suština svega.

MAHIR DEVIĆ – predsjedavajući (replika)

Općinsko vijeće usvaja svake godine Izvještaj o radu Javnog komunalnog preduzeća Vodostan Ilijaš i kroz taj izvještaj u svakom momentu može da traži informaciju u smislu granice. Mi sada po prvi put, stvar koja već postoji, podvlačimo granicu i kažemo do ovdje. Dakle, mi ozakonjujemo na neki način nešto što je neko davno ozakonio. Ima čitav sistem cijevi dole koji je izgrađen, ljudi su zakačeni na njega i da mi sada donosimo odluku, da mi iz Ilijaša gradimo novi vodovod dole, pa da na taj način nešto radimo, ja bih zaista mogao prihvatiti određenu vrstu diskusije, ali postoji sistem, velika cijev, pa manja, ljudi troše pa kažemo do ove granice, ja kako sam vidio u odluci su povučene granice, kaže se tačno do ovdje i na taj način se zaokružuje ova vrsta priče. Prema tome, ja ne vidim zaista na koji način se ne bi ovo Vijeće pitalo. Mi se možda administrativno olakšavamo, mene ne interesuje je li sada Hamo ili Meho, takvih može biti pet u narednih pet godina to je jasno.

ALAN ŠERAK – vijećnik SDP-a (krivi navod)

Dakle, očito Deviću, ubuduće kada dođeš na Vijeće, malo se spremi i pročitaj materijale, plaćen si adekvatno za te stvari, za razliku od svih ostalih vijećnika. Odluka o davanju

saglasnosti za realizaciju priključaka na vodovodnu mrežu u naselju Donja Vratnica općina Visoko, kaže član 1. iste Odluke, ove je krivi navod, jer si ti sada pričao stvari kao mi ćemo se pitati kroz neke izvještaje. Daje se saglasnost Javnom komunalnom preduzeću Vodostan d.o.o Ilijaš za realizaciju priključaka na vodovodnu mrežu u naselju Donja Vratnica općine Visoko. Dakle, mi njima dajemo saglasnost da bez našeg pitanja ubuduće te stvari rade, o tome ja govorim, a ne da bi se ti nešto pitao.

MUHAMED HANDŽIĆ – vijećnik BPS-a

Znamo mi svi da je voda prirodni resurs i životni resurs koji ljudski ne bi trebalo braniti nikome. Ovom Odlukom je definisano i granice vodovodne mreže, nema daljeg proširenja. Mi smo bili u jednoj situaciji prije par godina i gospodin predsjedavajući je tu bio, nismo dali saglasnost na onaj drugi dio tamo jer je to zahtijevalo veću potrošnju i investicije. Ono što su ljudi jednom stekli, stečeno pravo je ne otuđivo i mi to moramo znati, a to je pravo na vodu koju ljudi već imaju, mi se samo trebamo verifikovati sa ovom Odlukom koliko sam ja shvatio, potrošnju i korištenje vode sa našeg vodovodnog sistema. Dakle, hoće li tu biti desetak ili dvadesetak priključaka to uopšte nije bitno, ali me raduje činjenica da kroz ovu tačku dnevnog reda, da sam došao do spoznaje da mi ove godine ulažemo dva miliona maraka u vodosnabdijevanje općine Ilijaš i raduje me činjenica da mi imamo vode da je možemo i prodati u nekom periodu koji nije srazmjeran u ova dva mjeseca u kojem se nalazimo. Ja sad postavljam pitanje, ako ljudi rade plinovod iz Rusije preko BiH ili zemalja zapadnog balkana i dođe do nas i ne prekidaju ga idu dalje, zbog čega ćemo mi općini Visoko u njenom jednom dijelu mjesne zajednice prekinuti vodosnabdijevanje, ako su ljudi već imali vodosnabdijevanje prije rata, drugo je pitanje morala. Visoko i Breza su bile jedne od općina koje su primile sve Ilijašane izbjeglice, da li je to bila Vratnica, ali ste se vi svi koji ste bili u to vrijeme u Ilijašu našli u tom teritoriju i sad ja koji sam u to vrijeme bio u Sarajevu i ovi ljudi koje se možda nisu ni bili rodili, donosimo odluku hoćemo li dati Vratnici vodovod i vodu koju su oni imali ili će neki od njih već imati, meni to uopšte ne predstavlja problem, tu vodu za toliko domaćinstava izuzimajući privredne subjekte.

Ovi ljudi koji bolje znaju, ljudi koji su u Vijeću, ima li prostora za privredne kapacitete ili nema, a u odluci piše da će se morati dati naknadna suglasnost za to. Prema tome, meni to ne predstavlja problem.

RASIM ŠEHIĆ – vijećnik SDA

Igrom slučaja bio sam prije sedam dana prisutan na rijeci Misoči, na samom izvoru i kada ovo sve sada slušam, zapitam se znaju li naše kolege odakle nama i dolazi voda. Kako bi sada bilo da općina Vareš nama postavi branu i kaže vi više nemate mogućnost da dobijate vodu iz rijeke kojoj su velikim dijelom izvorišta na općini Vareš. Druga stvar, sada postavljam pitanje kolegama, načelnik je ovdje dobro definisao, osvrnivši se da se ovom Odlukom da mogućnost domaćinstvima da se napajaju vodom. Bilo ko sada od nas, sa moralne strane ako ovu Odluku ne izglasamo, jesmo li svjesni da bi to automatski značilo da mi ljudima koji žive dvadeset, trideset godina tu, koji su u to vrijeme kada se gradilo davali svoje doprinose sada bukvalno da mi ljudima siječemo šlauf. Za mene samo ne izglasavanje ove Odluke kako je definisao načelnik, znači da ljude ostavljamo bez vode.

SEAD ŠEHIĆ – vijećnik SBB-a

Nas buni ovdje jedna stvar, mi od Vodostana dobijamo uvijek nepotpune informacije, da

smo dobili informaciju u kojoj se kaže mi smo do 95-te imali toliko i toliko priključaka, poslije 95-te bilo je toliko i toliko, da li je zadruga Buco koja je ogromna gore bila isto priključena na naš vodovod, Primus i ostali pa da mi možemo na osnovu nekakvih tih podataka da kažemo ići će ili neće voda. Jednostavno mi dobijemo informaciju i to je to, a nigdje broja, koliko se koristi i šta. Još jedna stvar ima, ko je dozvolio ostalim ljudima koji su poslije 95-te priključili tu da se besplatno priključuju na tu vodu.

AKIF FAZLIĆ – općinski načelnik

Stalno insistiram na ovome da je ovo integralni dio našeg gradskog vodovodnog sistema. Ti ljudi koji su tada učestvovali u izgradnji stekli su sva prava kao i svi mi u Lješevu i Ljubinićima da imamo svoj razvoj i za taj razvoj da se ta voda obezbjeđuje. Ova Odluka podrazumijeva da ne treba sada dovoditi novog operatera, dovoditi iz Visokog, Vareša za taj broj nekih kuća dodatnih deset u Vratnici, jer suština odluke jeste da gledamo prostor a ne broj priključaka, dakle prostor jedne male podružnice i šta god se na njoj uradi treba da bude riješena kroz naš sistem. Ako to ne možemo prihvatiti, onda ova Odluka zaista nema smisla, ima smisla da stavimo granicu dole na granicu kantona, da zavravimo vodu i kažemo neka se Vratnica rješava kroz sistem kojim će se rješavati cjelokupna općina Visoko. Dakle, još jedanput da tako pokušamo gledati, taj prostor treba da bude zadovoljen potrebama vode na ovaj način bez obzira na broj. Znamo kakav je prostor, znamo kako je urbaniziran i da neke velike dodatne količine neće nikada biti potrebne.

MAHIR DEVIĆ – predsjedavajući

Kolegi Šehiću, da ne bi pogrešno razumio, možda se nismo u jednoj rečenici razumjeli, imam tu moralnu potrebu da obrazložim. Neke stvari nastanu same po sebi, mi smo imali ogromnu urbanizaciju Ilijaša koja je bila potreba, ljudi su izgradili na raznim mjestima kuće, infrastruktura do tih kuća košta milione maraka, naravno da mi trebamo izgraditi tu infrastrukturu, trebamo postaviti vodu, struju, rasvjetu, sve to trebamo stići. Stanje je bilo takvo kakvo je bilo, nismo nikome srušili kuće ni jedne. Ovdje imamo specifičnu situaciju, bez obzira što Vratnica administrativno pripada općini Visoko, oni su dio našeg vodovoda i mi to trebamo prihvatiti. Da li će taj čošak sada biti kažnjen i da mi njemu stavimo frakturu da će nas on ugroziti zbog nekih pet kuća, neće, ja sam rekao, da mi kao ozbiljan organ bavimo se unapređenjem ovog našeg preduzeća i dodatnih količina vode kojih imamo da ih pošaljemo do Zenice, to treba biti strategija i to je prava stvar. Prema tome, da se ne bi pogrešno razumjeli, naveo sam te dvije stvari, ljudima ne treba tu vrstu prava oduzeti i da će tih pet kuća spasiti ovdje ova dva mjeseca, ja bih rekao hoće ali neće i to znamo svi.

ALAN ŠERAK – vijećnik SDP-a

Cijelo se vrijeme na neki način nama ovdje pokušava kontrirati kao da smo mi protiv davanja vode i mi trebamo presjeći taj sistem dole koji izlazi iz okvira nase općine, to nije tačno. Dakle, mi se zalažemo za ono, ljudi su samofinansiranjem nekada gradili taj sistem dole i ti ljudi trebaju da ostanu na sistemu vodosnabdijevanja koji dolazi iz općine Ilijaš, ali da to bude to, dalje nema, ostali objekti koji će se dole praviti to neka rješava načelnica koja nam dolazi iz Visokog, to je njen primarni zadatak, a ne naš.

MIRSAD OSMANOVIĆ – vijećnik SDP-a

Nisam htio kada se radi o vodi, osjetljivo je govoriti, međutim ovi dušebrižnici posebno

kolega Handžić, ogavna mi je ova priča, kao oni dobri momci, neko je loš itd. Ovdje mi moramo postaviti nekoliko pitanja. Svakoj osobi koja je imalo čovjek je teško pričati o vodi, ali ja malo više znam i ovo što je Alan rekao, mene brine "rekla kazala" i brinu me izmjene, diskusija i tvrdnji koje su bile prije godinu, pet i ona cijev na izlazu općine Ilijaš. Dobro zna Meliha i Akif, ljudima treba voda i ja ću postaviti samo nekoliko pitanja.

Zašto nemamo više tehničkih podataka, zašto ovo priča u dobroj namjeri predsjedavajući, načelnik i ovi koji malo krivudaju, nama vijećnicima je jasno da treba da štitimo Ilijaš.

Koji je primarni vod, ja se neću udaljavati da govorim bit će dole kapaciteti, ja ću pitati hoće li biti nešto u Lješevu, koji je cilj primarni vod u Lješevu, ovo što kažu, daj Bože da imamo vode da Zenici dajemo, ne možemo, moramo vršiti rekonstrukciju. Ja se slažem, svi smo mi ubijali krivine kad smo morali, ali kad se postavi nešto na svoje mjesto, nema ovdje ni jednog vijećnika koji je kreten koji ne bi pomogao ljudima. I još jedno, breme nadležnosti Općinskog vijeća prebaciti na upravljačke strukture, ovo govorim iz iskustva.

MAHIR DEVIĆ – predsjedavajući

U Luci, kompletan vodovod je izgrađen samo doprinosima građana. Istu takvu situaciju imamo i na Junakovcu, ljudi kažu mi vama ne damo taj vodovod, mi plaćamo uposlenike u Vodostanu, oni tu vodu hloriše, a oni daju neku vrstu saglasnosti, zamisli te nadležnosti.

Mi sada ovo što prenosimo na tačno nacrtanom području šta naše preduzeće može uraditi, ono je nacrtano i svake godine to preduzeće podnosi ovdje izvještaj. Krene li ono dalje van sistema prekršilo je odluku. Mi platili tu vodu dole, na neki način, građani ko god je doselio, pa zakači se na vodovod još ga predali u nadležnost vodovoda. Nema tu nekih specijalnih principa, osim ljudskog i moralnog, ovdje je osnovna stvar sljedeća taj vodovod je u našem sistemu, jedina varijanta da se mi zaštitimo sljedeća, cvak na kraju i da kažemo Visoko vodite kompletan vod odozdo i zakačite te ljude i da ostavimo ljude bez vode, to ne možemo nikako, pogotovo što su plaćali, jer sutra bi nas ljudi na Ustavnom sudu dobili. Sada se postavlja sljedeće pitanje hoće li se taj kapacitet sa nekoliko tih objekata koji će se izgraditi, nas zaista ugroziti? Mi svi veoma dobro znamo da neće i da je urbanizacija tog prostora 95 % završena, više će se opteretiti u našim Podlugovima, Lješevu, Ljubnićima, jer se tu više gradi. Tamo u Vratnici je to skoro pola završeno i mi to svi znamo, prema tome ljudski bi bilo da ovo podržimo.

MUHAMED HANDŽIĆ – vijećnik BPS-a

Kolega Osmanoviću, tvoja priča je neumjesna, posebno jer diskutuješ kako je moja diskusija tebi ogavna, mogu ti reći i da je tvoja svaka diskusija meni ogavna i da me apsolutno ne interesuje šta ćeš ti reći i tvoje mišljenje me ne interesuje, jer vijećnici BPS-a su ušli u Vijeće bez ikakve hipoteke. Mi se nismo nikome zadužili i nemamo kredita ni kod koga. Prema tome, mi ćemo nekim tačkama i nekim projektima dati podršku ili nećemo dati, u zavisnosti od naše procjene. Ti najmanje imaš pravo tu da diskutuješ je li moja diskusija ogavna ili nije.

ALAN ŠERAK – vijećnik SDP-a

Predsjedavajući zamolit ću te da vodiš ovu sjednicu, u granicama neke korektnosti, da ne dozvoliš ovaj tip diskusije koji kolega Handžić ovdje sada ima, ako ne onda ću se ja poslije njega svakako javiti pa ćemo malo drugačijim tonom pričati.

MUHAMED HANDŽIĆ – vijećnik BPS-a

Ukoliko prelazim granice iz okvira ja sam spreman snositi određene sankcije, ali ne dozvoljavam da se na ovakav način prema meni ophodi niko od vas vijećnika, jer se ni ja prema vama ne ophodim tako. Dakle, pričajmo jednim jezikom, ljudskim, jednim jezikom, parlamentarnim.

ALAN ŠERAK – vijećnik SDP-a

Uvaženi kolega Handžiću, jasno mi je da ste vi kupljeni davno od strane vladajućih struktura u ovoj općini, a to se i vidi, iz mjeseca u mjesec, nemojte da vam sada citiram šta je sve urađeno. I to da nemate hipoteka, kako ste vas dvojica ušli u vijeće, možemo i tu temu otvoriti. Otvorit ćemo je tamo u septembru, oktobru pa ćemo vidjeti ko je kome šta obećavao, pritiskao i na koji način da se glasa za BPS, koristeći jedno od naših resornih Ministarstava u Kantonu Sarajevo. Dakle, ta tema će svakako biti ovdje postavljena i istražena do krajnjih granica.

Zamjenik predsjedavajućeg je zaključio raspravu po navedenoj tački dnevnog reda, te je uslijedila pauza od 11:20 -11:25.

Nakon pauze, diskutanata po ovoj tački dnevnog reda više nije bilo, pa je zamjenik predsjedavajućeg dao na glasanje Prijedlog Odluke o davanju saglasnosti za realizaciju priključka na vodovodnu mrežu u naselju Donja Vratnica, općina Visoko uz izmjenu koju je općinski načelnik naveo u uvodnom izlaganju da se ona odnosi isključivo na domaćinstva u naselju Donja Vratnica. Obzirom da je vijećnik Alan Šerak izrazio sumnju u glasanje pristupilo se pojedinačnom glasanju.

ZA su glasali slijedeći vijećnici: Mahir Dević, Muamer Dervišević, Alma Omerović, Mehmed Sinanović, Adem Alić, Saudin Durmić, Armin Matoruga, Semir Dedić, Halid Dizdarević, Rasim Šehić, Melisa Matoruga, Alen Hasković, Asim Mujić, Muhamed Handžić i Almir Špiodić.

PROTIV su bili slijedeći vijećnici: Alan Šerak, Damir Filipović, Mirsad Osmanović i Edhem Hasanović.

UZDRŽANI su bili slijedeći vijećnici: Akif Bešlija, Sead Šehić, Semir Dizdarević i Meho Džindo.

Odsutni vijećnici: Anel Bumbulović i Besim Gljiva.

Konstatovano je da je sa 15 glasova ZA, 4 PROTIV i 4 UZDRŽANA glasa, Općinsko vijeće donijelo

Odluku o davanju saglasnosti za realizaciju priključka na vodovodnu mrežu u naselju
Donja Vratnica, općina Visoko

- a) usvajanju Regulacionog plana "Apartmansko naselje Sovrle 1"-Ilijaš
- b) provođenju Regulacionog plana "Apartmansko naselje Sovrle 1"-Ilijaš

MELIHA AVDIBEGOVIĆ - pomoćnica načelnika

Radi se o lokalitetu za koji je usvojen nacrt plana, za koji je proveden javni uvid u trajanju od petnaest dana, obavljena javna rasprava i nije bilo primjedbi ni sugestija. Radi se o lokalitetu na kojem je planirano osamnaest objekata, od kojih je sedamnaest individualnih objekata, a jedan je u službi održavanja i osiguranja naselja u službi društvenih djelatnosti. Snabdijevanje vodom vršit će se sa planiranog rezervoara i preko planirane pumpne stanice, rekonstrukcijom postojećeg cjevovoda i izgradnjom novog cjevovoda.

MIRSAD OSMANOVIĆ – vijećnik SDP-a

Prvo, interesantno jeste da se ova naselja odvajaju od građana, kada se tiče vodosnabdijevanja. Mene interesuje kapacitet rezervoara, presjek dovodnih cijevi od glavnog rezervoara i čija je nadležnost ovaj rezervoar koji se pravi do naselja i da li to kontroliše naše javno preduzeće.

ALMIR ŠPIODIĆ – vijećnik BPS-a

Ja također imam pitanje, kada je u pitanju apartmansko naselje, interesuje me da li će se vršiti selektivna sječa šume, jer na ovoj lokaciji imamo borove koji nisu nimalo mali, da li će se to vršiti selektivno kao što se to vršilo u apartmanskim naseljima za koja smo davali saglasnost.

MELIHA AVDIBEGOVIĆ – pomoćnica načelnika

Infrastruktura koja se gradi do naselja, ja sam to više puta rekla, ide na općinu Ilijaš. Kompletna dokumentacija, urbanistička saglasnost, dozvola, tehnički prijem, ide na općinu Ilijaš i u nadležnosti je općine Ilijaš, koja će poslije izgradnje tog vodovoda prenijeti u nadležnost Vodostana Ilijaš. Isto kao što smo do sada prenosili, isto je to i za kanalizacionu mrežu. Sada imamo primjer apartmanskog naselja Popovići, koje je izgradilo vodu, dokumentacija je na općini Ilijaš, u fazi su sada izdavanja urbanističke i odobrenja za građenje za kanalizacionu mrežu. Kada se izgradi, izvrši tehnički prijem, prenijet će se to u nadležnost Vodostana Ilijaš. Kompletna infrastruktura unutar naselja, koje je označeno granicama, kao vlasništvo ovih investitora ide na investitore. Ali, i oni poslije izgradnje imaju isto tako urbanističku dozvolu, ide kompletna dokumentacija, tehnički prijem. Po završetku tih radova, po završetku izgradnje i tehničkog prijema, ti investitori isto tako moraju prenijeti na neko preduzeće, slijedom stvari bi bilo logično, to i jeste tako i u razgovorima ta će se infrastruktura prenijeti na upravljanje našem Vodostanu Ilijaš. Ukoliko ima šume gore, zna se procedura dobijanja odobrenja za sječu šume. Po prostorno planskoj dokumentaciji taj lokalitet nije označen kao šuma.

ALMIR ŠPIODIĆ – vijećnik BPS-a

Možda se ne vodi kao šuma, ali ja sam bio gore na terenu, interesanto je da je građevinsko zemljište obuhvaćeno tik uz granicu rudnog područja gdje obuhvata i malo mi

je nelogično da baš na ovom dijelu ne prolazi rudno polje. Što se tiče šume, zaista je gore velika šuma, to je borova šuma i mislim ako dođe do sječe te šume, vrlo lahko može doći do klizišta, a znamo da su ispod privatni objekti ljudi koji su napravili kuće.

Diskutanata po ovoj tački dnevnog reda više nije bilo, pa je Općinsko vijeće većinom glasova usvojilo

- a) Odluku o usvajanju Regulacionog plana "Apartmansko naselje Sovrle 1"-Ilijaš
- b) Odluku o provođenju Regulacionog plana "Apartmansko naselje Sovrle 1"-Ilijaš

AD-6.

Nacrt Odluka o:

- a) provođenju Regulacionog plana "Apartmansko naselje Sovrle"
- b) usvajanju Regulacionog plana "Apartmansko naselje Sovrle"

ALMIR ŠPIODIĆ – vijećnik BPS-a

Uvidom u ovu kartu koju ste nama prezentovali u materijalima, vidim da ste ovdje označili vjerske objekte, ne znam da li ste konstatovali Islamsku zajednicu, jer znamo da jedino one imaju ingerencije kada su u pitanju vjerske izgradnje objekata. Bojim se da se ne dovedemo u situaciju da usvojimo sve ovo, pa da kasnije imamo problem oko legalizacije, pa da se dovedemo u situaciju da ga moramo rušiti. Na ovoj karti, jasno su prikazani vjerski objekti, zelene kockice, zelene linije, pa bih volio da mi to pojasnite.

MELIHA AVDIBEGOVIĆ – pomoćnica načelnika

Regulacionim planovima, usvajanjem regulacionog plana ne daje se pravo vlasništva, postupak urbanističke dozvole za svaki objekat je pojedinačan. Što se tiče tih objekata, to svi znaju, imamo i situaciju u Popovićima, da su bili podnijeli zahtjev investitori, da je to vraćeno i da taj objekat ide na medžlis Islamske zajednice. Svi vjerski objekti, džamije, koji su planirani u sklopu regulacionih planova isključivo mogu ići u vlasništvo medžlisa Islamske zajednice koje će graditi te objekte.

Diskutanata po ovoj tački dnevnog reda više nije bilo, pa je Općinsko vijeće većinom glasova donijelo

ZAKLJUČAK

1. Utvrđuje se Nacrt Regulacionog plana "Apartmansko naselje Sovrle", Nacrt Odluke o provođenju Regulacionog plana "Apartmansko naselje Sovrle" i Nacrt Odluke o usvajanju Regulacionog plana "Apartmansko naselje Sovrle".

2. Javni uvid na Nacrt Regulacionog plana "Apartmansko naselje Sovrle", Nacrt Odluke o provođenju Regulacionog plana "Apartmansko naselje Sovrle" i Nacrt Odluke o usvajanju Regulacionog plana "Apartmansko naselje Sovrle" stavlja se na Javni uvid u periodu od petnaest dana od 21.07.2017. do 04.08.2017. godine, a Javna rasprava na nacrt Regulacionog plana "Apartmansko naselje Sovrle", Nacrt Odluke o provođenju Regulacionog plana "Apartmansko naselje Sovrle" i Nacrt Odluke o usvajanju Regulacionog plana "Apartmansko naselje Sovrle" održat će se 07.08. (ponedjeljak) 2017. godine u maloj sali Općine Ilijaš, II sprat, sa početkom u 14 sati.

3. Primjedbe, prijedlozi, sugestije i mišljenja svih zainteresovanih subjekata planiranja, MZ-a, potencijalnih investitora, građana, vijećnika Općinskog vijeća Ilijaš, dostavljaju se

Općini Ilijaš, Službi za prostorno uređenje i stambeno komunalne poslove, koja organizuje i sprovodi javnu raspravu.

4. Služba za prostorno uređenje i stambeno komunalne poslove dužna je nakon sprovedene javne rasprave da podnese izvještaj Općinskom vijeću Ilijaš, o rezultatima Javne rasprave koji sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni.

AD-7

Prijedlog Odluke o načinu i uslovima prodaje neizgrađenog gradskog građevinskog zemljišta - Alića Gaj

Diskutanata po ovoj tački dnevnog reda nije bilo, pa je Općinsko vijeće većinom glasova usvojilo

Odluku o načinu i uslovima prodaje neizgrađenog gradskog građevinskog zemljišta - Alića Gaj

Nakon što je iscrpljen dnevni red, zamjenik predsjedavajućeg Alen Hasković zaključio je jedanaestu sjednicu OV-a Ilijaš u 12:15h.

Zapisničar:
Maida Habibović

ZAMJENIK PREDSJEDAVAJUĆEG
OPĆINSKOG VIJEĆA ILIJAŠ

Alen Hasković

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
Broj certifikata:20938

